

**Erich Bolinius**

E-Mail: Erich.Bolinus@t-online.de

**(Bericht über den BSV Kickers Emden - Sendung „Flutlicht“ auf Radio Ostfriesland  
Donnerstag, 12.1.2012 18.05 Uhr auf 94.0 bzw. 87,7)**

Moin, leev Toehörers,

’n Spölbericht van de 1. Mannskupp van Kickers Emden kann ik immer noch neet geven. Hoop aber, dat de Spöleree, wenn villicht ok blot in de Hall, ok för Kickers Emden, bold weer los geiht un wi uns ok in disse Sendung „Floetlücht“ weer heel un dall up dat Foetballspölen konzentrieren können. Man, sowiet is dat noch neet. Natürelk hopen all Kickersfans dat de Insolvenzverwalter dat klaar kriggt, dat dat Verfahren open maakt word. Dat he dorbi versöcht, de Tiedpunkt van Begünn van de Insolvenz toerügg in dat Jahr 2009 toe dateren, dat kann ’n för de Wiederbestahn för de Vereen blot van Vördeel wesen. Mutten doch de Firmen of Behörden, de siet disse Tied Geld van Kickers kregen hebben, dat Geld in de Kasse van Kickers toerüggbetahlen. Spietelk is dat natürelk för lüttje Firmen, de up dat Geld sülvst anwesen sünd. Aber de Behörden, Berufsgenossenschaft un de GEMA, de könt up dat Geld wall verzichten, meen ik. Villicht find de Insolvenzverwalter un Bremer Rechtsanwalt **Axel Gerbers** ja ok hier ’n Lösung.

Interessant is ok, wat so in de Kickers-Fanforum schreven word. De Menen gahn hier wiet utnanner. Dor giff dat aber ok Querdrievers, fraag mi, wat de in de Fanforum overhoopt wölen. Aber de meisten, de dor wat in schriepen, stahn achter de Mannskupp. Un dat is ja ok all wat wert. Ohn würrelke Fans löppt ok in Toekummst nix!

Heel moi funn ik, dat de bekannte Emden **Sportdokter Jörg Winter** na twee Jahr de Weg weer toerügg nach Kickers Emden funnen hett. He, de domaals, wall he för sien Arbeit as Doktor keen Geld van Kickers sehn hett, sük van Kickers verofskeddt harr, will nu weer mithelpen, dat dat mit de Vereen wieder geiht. In de Emden Bladd hett he seggt, dat dat sportlich in Emden ohn de Spölbedriev in de dert Liga langwierig worden is. Un he deit all Emders upfördern, mittoehelpen, dat Kickers dor weer henkummt. Disse Instellen finn ik heel nobel. Mögen sük ok anner Lü, de sük van Kickers na dat Verlaten van de dert Liga verofskeddt hebben, sük ’n Beispiel an Dr. Winter nehmen, un ok weer komen. Ik bün seker, wenn all, de wat för de Vereen Kickers Emden over hebben, an een Tau trecken, aber blot in een Richt, dat Kickers dann overleven deit un in paar Jahren dor weer steiht, wor he al maal west is.

Man ohn Sponsoren geiht dat neet. Dorum is dat heel wichtig, dat de groot Firmen in Oostfriesland mit in dat Kickersboot halen worden. Un ik denk ok an VW. De geven för de VFL Wolfsburg zig-Millionen van Euros ut. Dat is ja bold neet toe löven, wat de Trainer **Felix Magath** dor utgeven dürt. Wenn Kickers dor blot ’n heel lüttje Slickje van ofkeeg, was de Vereen al hulpen. In Emden arbeiten bold 10.000 Lü för VW. De Betriebsraad muss doch klaar kriegen können, dat de Bossen in Wolfsburg ok Kickers Emden ’n bietje unner de Arms griepen. Villicht klappt dat ja, wenn Kickers eerst maal de komende Wochen oversteiht un de Vörstand mit neei Konzepten ok dat VW-Wark overtügt. Ofwall eenige Fans, de alltied in de Kickers-Forum schriepen, dat Woord „Konzept“ neet mehr hören können.

Drücken wi aber all eerst maal beid Dumen, dat de Spölbedriev in de Oberliga Neddersassen wieder gahn kann un Kickers in de kommende Saison in de Landesliga ’n neei Anloop nehmen kann, weer hoger toe spölen.

So, as alltied, toe Schluss noch ’n kört Foetballwitz:

**Uli Höneß** sitt in de Sendung „Wer wird Millionär“ bi **Günther Jauch**. Jauch fraggt hum:  
„Heer Höneß, se hebben seggt, dat se alles over Foetball weten, stimmt dat?“ Hönes grinst un  
seggt: „Ja, dat stimmt, over Foetball weet ik alles. Dor kann komen wat will.“  
„So“, seggt Jauch, „dann seggen se mi ehm, wovöl Maschen hett ’n Tornett.“

So leev Toehörers van Radio Oostfreesland,  
ik hoop, Joe hett dat Plattdütsk gefallen, denn mien Motto heet ja alltied,  
plattdütsk dürt nettso as Kickers Emden – neet unnergahn.  
Bit anner Maal  
Joe  
Erich Bolinius  
ut Emden-Petjem.